

欽定全唐文

欽定全唐文卷八百八十九目錄

王宗佶

上蜀高祖表

王宗儔

李延呗投狀乞免役事佛判

馮涓

爲蜀王建草斬陳敬瑄田令孜表

諫伐李茂貞疏

諫用兵疏

韋莊

乞追賜李賀皇甫松等進士及第奏

爲蜀高祖答王宗綰書

又元集序

韋藴

浣花集序

吳崇

重修開元天寶觀記

周德權

上蜀高祖勸進表

李道安

上災異疏

林罕

林氏字源編小說序

十在文

許寂

上蜀主求賢書

謝信物書

蜀答聘書

欽定全唐文卷八百八十九

王宗佶

宗佶本姓甘氏洪州人蜀先主王建養子以軍功累遷武  
信軍節度使天復初充扈駕指揮使進太師封晉國公後  
爲樞密使唐道襲所構先主命撲殺之

上蜀高祖表

臣官預大臣親則長子國家之事休戚是同今儲貳未定  
必生厲階陛下若以宗懿才堪繼承宜早行冊禮以臣爲  
元帥兼總六軍倘以時方艱難宗懿沖幼臣安敢持謙不

當重事陛下既正位南面軍旅之事宜委之臣下臣請開元帥府鑄六軍印征戍徵發臣悉專行太子視膳於晨昏微臣握兵於環衛萬世基業惟陛下裁之

王宗儔

宗儔蜀先生王建養子累授天雄軍節度使兼侍中乾德三年擢山南節度使充西北面都招討行營安撫使以後主王衍荒淫憂憤卒

李延召投狀乞免役事佛判

雖居兵籍心在佛門修心於行伍之間達理於幻泡之外

歸心而依佛化截足以事空王壯哉貔貅何太猛利大願  
難阻真誠可嘉准狀付本軍除落名氏仍差虞候監截一  
足訖送真元寺收管灑掃焚修

馮涓

涓字信之婺州東陽人登大中四年宏辭科進士起家京  
兆府參軍昭宗時官祠部郎中擢眉州刺史蜀主分藩西  
川表爲節度判官厯官至御史大夫卒

爲蜀王建草斬陳敬瑄田令孜表

開匣出虎孔宣父不責他人當路斬蛇孫叔敖非因利已

專殺不行於閫外先機恐失於彀中臣輒行閫制處斬訖

諫伐李茂貞疏

臣聞興師者殘兵力虛府庫弊羣畜損弓甲衰農桑動德  
義興詐僞故損國害人莫先於用兵也方今梁王朱全忠  
霸盛強據兩京料其先取河東河東梁之敵國也勢不兩  
立儻一處爲雄卒天下之眾一舉西來縱諸葛重生五丁  
復出無以泥封大散石鑠劍門今秦庭實蜀之巨屏也去  
其屏窺見庭館焉莫若與秦王和親稍稍以麻布茗草給  
之不傷於大義濟之以小利蜀但訓兵秣馬因敵料強足

可以保天祿於三川固子孫於萬葉潛令公主探其機密  
窺彼室家俟便攻之一舉而獲可也

諫用兵疏

古之用兵非以逞威暴而肆殺戮盡以安民爲先豐財爲  
本湯武無忿怒之師高光有魚水之士故能應天順人弔  
民伐罪今自土德云蒙朱梁逞虐雍都洛邑盡是荆榛江  
南山東各有割據鬪力則人各有力用兵則人各有兵陛  
下欲以一方之強舉萬全之策臣恐陛下之憂不在於秦  
雍而在於肘腋之下也

韋莊

莊字端已見素之後乾寧中登進士第爲判官擢左補闕  
蜀主爲西川節度副使昭宗命莊宣諭兩川遂畱蜀掌書  
記尋擢起居舍人爲安撫副使蜀主開國進左散騎常侍  
判中書門下事累官至門下侍郎吏部尚書同平章事武  
成三年卒謚文靖

乞追賜李賀皇甫松等進士及第奏

詞人才子時有遺賢不霑一命於聖明沒作千年之恨骨  
據臣所知則有李賀皇甫松李羣玉陸龜蒙趙光遠溫庭

筠劉德仁陸達傅錫平曾賈島劉稚珪羅鄴方干俱無顯  
遇皆有奇才麗句清詞徧在詞人之口銜冤抱恨竟爲冥  
路之塵伏望追賜進士及第各贈補闕拾遺見存惟羅隱  
一人亦乞特賜科名錄升三級便以特勅顯示優恩俾使  
已升冤人皆霑聖澤後來學者更勵文風

爲蜀高祖答王宗綰書

吾蒙主上恩有年矣衣襟之上宸翰如新墨詔之中淚痕  
猶在犬馬尚能報主而况人之臣子乎自去年三月東還  
連貢二十表而絕無一使之報天地阻隔叫呼何及聞上

至穀水臣僚及官僚千餘人皆爲汴州所害至洛果遭弑逆自聞此詔五內糜潰方枕戈待旦思爲主上報讐今使來不知以何宣告

又元集序

謝元暉文集盈編止誦澄江之句曹子建詩名冠古惟吟清夜之篇是知美稼千箱兩歧葵少繁絃九變大濩殊稀入華林而珠樹非常多閱眾籟而紫簫惟一所以擷芳林下拾翠巖邊沙之汰之始辨辟寒之寶載雕載琢方成瑚璣之珍故知領下採珠難求十斛管中窺豹但取一斑自國

朝大手名人以至今之作者或百篇之內時紀一章或全集之中微微數首但掇其清詞麗句錄在西齋莫窮其巨派洪濶任歸東海總其記得者才子一百五十人誦得者名詩三百首長樂暇日陋巷窮時聊撼膝以書紳匪攢心而就簡蓋詩中鼓吹名下笙簧擊鳬氏之鐘霜清日觀淬雷公之劍影動星津雲間分合璧之光海上運摩天之翅奪造化而雷雲噴湧役鬼神而風雨奔馳但思其食馬雷肝徒云染指豈慮其烹魚去乙或至傷鱗自慙乎龜腹易盈非嗜其熊蹯獨美然則律者旣採繁者是除何知黑白

之鷺強識淄澠之水左太沖十年三賦未必無瑕劉穆之一日百函焉能盡麗是知班張屈宋亦有蕪辭沈謝應劉猶多累句雖遺妍可惜而備載斯難亦由執斧伐山止求嘉木挈瓶赴海但汲甘泉等同於風月烟花各是其榦梨橘柚昔姚合所撰極元集一卷傳於當代已盡精微今更採其元者勒成又元集三卷記方流而目眩閱麗水而神疲魚兔雖存筌蹄是棄所以金盤飲露惟採沆瀣之精花界食珍但享醍醐之味非獨資於短見亦可貽於後昆採實去華俟諸來者光化三年七月二日前左補闕韋莊述

韋鵠

謁前蜀莊弟

浣花集敘

余家之兄莊自庚子亂離前凡著歌詩文章數十通屬兵  
火迄與簡編俱墜惟餘口誦者所存無幾爾後流離漂泛  
寓目錄情子期懷舊之辭王粲傷時之製或離羣軫慮或  
反袂興悲四愁九愁之文一詠一觴之作迄於癸亥歲又  
綴僅千餘首庚申夏自中諫閼四字辛酉春應聘爲西蜀奏  
記明年浣花溪尋得杜工部舊址雖蕪沒已久而柱砥猶

存因命芟夷結茅爲一室蓋欲思其人而完其廬非敢廣  
其基構耳藹便因閒日錄兄之藁草中或默記於吟詠者  
次爲五卷目之曰浣花集亦杜陵所居之義也餘今之所  
製則俟爲別錄用繼於右時癸亥年六月九日藹集

吳崇

崇前蜀乾德時人

重修開元天寶觀記

原夫混茫無象生元氣以發揚太極成形建兩儀而交感  
是故一升一降既慘既舒深知要妙之門默起自然之理

萬化皆歸於橐籥八風尋運於璿璣雖開闔紫宸實分官  
於九府而主張玉籍俱命職於羣真洎周朝則教演五千  
流唐室則宗分前後所以法天取則帝王崇至靜之源秉  
一成功冠褐慕至和之境得之者壽失之者亡羲軒冀表  
於前芳茅許將傳於故事上則雲官月殿熒煌高鎖於三  
清下則瓊室珠房重疊旁分於五嶽權福罪則皆同影響  
叩希夷則莫睹樞機然後九有延祈故崇宮廟三元禮醮  
遍列壇場苟邦國以長興諒焚修而不泯其謂乎開元觀  
者城東異境物外靈蹤實乾坤秀麗之鄉乃雲鶴盤旋之

地當吳大帝龍驤碧漢鵠起金陵奉元元而且夕未皇執  
蹠靜而禱祈不倦訪鼎湖之舊迹尋河上之元風儻尚虛  
無必開虔奉至寶鼎四載乃方立爲崇眞之觀初標堂宇  
繼設住持綿星紀以逾深存香燈而不闕值隋皇革命神  
器移天方當在宥之初遽布維新之政開皇十一年又換  
元額爲崇僊之觀遇大唐高祖皇帝應天徇物捲眾臨戎  
定山河爲一統之宗使區宇絕三分之勢明明表德蕩蕩  
垂風及元宗皇帝躬乘大寶克顯不圖復會僊師同訪桂  
花宮裏潛逢聖祖還遊羊角烟中萬年以表於殊風四海

仍新於大號開元二十六年又奉更改則今之名額也崇  
基宛若真像豁如以次薰修遞相嚴敬有道士彭法宣等  
各懷道德繼備精虔表方隅歸向之場顯塵世祈求之旨  
及乎咸通已後玉闕據虎金革犯秦經兵火以延焚因毀  
殘而廢墜暨皇唐復霸帝業中興刺史張公承傑心懸妙  
理志慕真筌洞鑒精虔深委功績至保大九年相次捨置  
三清尊殿功德寶壇等志堅有感德邁皆通是表良因用  
成其事由是散求郢匠廣布楚材梁棟雲鋪棼橑鱗次殿  
堂纔畢巍巍籠紺霧細霞廊廡方開赫赫布祥光瑞色真

容聖像儼若化來玉女仙童忽如降下黼黻而皆成異境  
清虛而盡似仙鄉芬芳之琪樹祥花繚繞之松陰桂影疑  
十洲之風月移在人間眺萬洞之烟霞宛如象外矧以前  
臨大道紅塵不惹於元關後跨長江濤浪同舍於妙性八  
海之羽人頻至五山之詞客如歸豈讓丹邱何殊闔苑將  
期立績冀僕厥功上可以裨贊皇圖下可以休禎庶類而  
崇智乏精通才非敏速忝承來命請紀殊猷立言慙袞貶  
之文握筆絕色絲之字冀遷陵谷用表貞珉長爲不朽之  
名永作無窮之譽時乾德二年太歲甲子十月十五日記

周德權

德權許州人事蜀主爲眉州刺史累遷太保中書令永平元年卒贈太師

上蜀高祖勸進表

案讖文李祐西王逢吉昌土德兌興丹莫當李祐者唐亡也西王者王氏興於西方也逢吉昌者逢字如殿下之名也土德坤維也兌興亦西方也丹莫當者丹朱也言朱梁不敢與殿下抗也願稽合天命仰膺寶籙使天地有主人神有依

李道安

道安蜀乾德時人

上災異疏

倉廩者國之本糧食者人之命固其本則邦寧重其命則人富今粒食中皆生蜂蠻切疑在位貪鄙奪民農時戕害人命故天生災異以爲警告又蟲皆曳米而行恐邊鄙不寧干戈忽起饋挽相繼人不堪命伏願少精聖慮與大臣恐懼修省以消災異

林罕

罕字仲緘西江人事蜀後主除溫江主簿遷太子洗馬

林氏字源編小說序

罕長興二年歲在戊子時年三十有五疾病踰時閒坐思書之點畫莫知所以乃搜閱今古篆隸始見源由旋觀近代以來篆隸多失始則茫乎不知終則惜其錯誤欲求端正將示同人病間有事其志不遂至明德二年乙未復病迄於丁酉冬不瘳病中無事得遂前志與大理少卿趙崇祚討論成一家之書昔孔安國尚書序云古者伏羲氏之王天下也始畫八卦造書契以代結繩之政由是文籍生

焉賈耽鎮滑州時作偏傍字源序云降及夏殷周通謂之古文至宣王太史史籀著大篆十五篇與古文小異七國分裂篆與古文隨其所尚始皇兼并海內丞相李斯遂收拾遺逸作蒼頡七章中車府令趙高作爰歷七章太史胡母敬作博學七章竝約籀文篆體轉工世卽謂之小篆屬秦政滋煩人趨簡易故軍正程邈變古文大小篆作隸書然書之所興莫定何代隸之所起始自秦時篆者取蟲篆之形隸者便徒隸之用漢初有書師以隸合小篆爲五十章教於鄉里平帝元始中徵通書會京師者百有餘人

方立小學之科楊雄採掇其可用者作訓纂八十九章至東漢班固加十三章共一百二章二千一百二十字雖羣書竝載而目錄不分惟太尉祭酒許慎取其形類作偏傍條例十五卷名之曰說文頗有遺漏呂忱又作字林五卷以補其闕洎三國之後厯晉魏陳隋書甚行篆書殆將泯滅至唐將作少監李陽冰就許氏說文復加刊正作三十卷今之所行者是也其時復於說文篆字下便以隸書照之名曰字統開元中以隸體不定復於隸書字統下錄篆文作四十卷名曰開元文字自此隸體始定矣兼改古文

尚書及無平不陂字卽其類也先已有九經音義及切韻  
玉篇行焉大厯中司業張參作五經文字三卷凡一百六  
十部其序畧云以類相從務以易了不必舊訛自非經典  
文義之所在雖切於時畧不集錄以明爲經不爲字也開  
成中唐元度以五經文字有所不載復作新加九經字樣  
一卷凡七十六部其序畧云有偏傍上下本所無者纂爲  
雜辨部以統之然九經所有之字卽加訓切况是隸書莫  
知篆意其字注解或云說文者卽前來兩說文也或云石  
經者卽蔡邕於國學所立石經也或云隸省者卽隸減也

唐立石經乃蔡邕之故事也周禮保氏掌養國子以道教  
之六書謂象形指事會意諧聲轉注假借六者造字之本  
也篆雖一體而隸變數般篆隸卽興訛舛相錯非究於篆  
無由曉隸六書者非止著一意而屬一字一字之內有占  
六書二三四者大都造字皆包含六意字有正者倒者橫  
而在上中下者豎而在左右中者向者背者竝者重者順  
者逆者左者右者俯者仰者橫坼而裏別字者豎開而夾  
別字者有一字成者有全二字三字四字五字合成为者有  
省二字三字四字合成为者隸書有不拋篆者有全違篆者

有減篆者有添篆者有篆隸同文者在篆體則可辨變隸體則多有義異而文同篆亦有之今悉解之於後文此不同例俗有隸書賦者假託許慎爲名頗乖經史據顏氏家訓云斯實陶先生弟子杜道士所爲大誤時俗吾家子孫不得收寫又有古今隸書端字決疑賦更不經於隸書賦當今之世不可學之又有文下作子爲學更旁作生爲蘇凡數十百字謂之野書唐有勅文明加禁斷今往往見之亦不可輒學顏真卿撰千祿字書一卷每一字作三般卽注云上正中通下俗旣合標題合有褒貶全無與奪亦無

取焉其道書鬼書天篆章草八分飛白破體行書無益於字此亦不錄篆隸有筆力遒健字勢妍麗斯乃意巧之人臨文改易或參差之長短之屈曲之抑揚之務於奇怪以媚一時後習之人性有利鈍致與元篆隸不同蓋病由此起今之學者但能明知八法洞曉六書道理旣全體格自貴亦何必踵歐虞褚柳之惑亂哉罕今所篆者則取李陽冰重定說文所隸者則取開元文字雖知魯鈍不失源流所貴講說皆有依憑點畫自無差誤杜征南注左氏春秋以經雜傳謂之集解何都尉論語序云今集諸家之善亦

謂之集解罕以隸書解於篆字之下故效之亦曰集解今以說文浩大備載羣言卷軸煩多卒難尋究翻致情亂莫知指歸是以翦截浮辭撮其機要於偏傍五百四十一字各隨字訓釋或有字關起字者省而難辨者須見篆方曉隸者雖在注中亦先篆後隸各隨所部載而明之其餘形聲易會不關造字者則畧而不論其篆文下及注中易字便以隸書爲音如稍難者則紐以四聲四聲不足乃加切韻使學者簡而易從渙然冰釋於說文中已十得其八九矣名之曰林氏字源編小說古人窮困湮厄而述作興罕

也卧疾數年飽食終日思有開悟貽厥將來非欲獨藏私  
家實冀徧之天下乃手書刻石期以不朽一免傳寫之誤  
二免翰墨之勞或有索之易爲脫本審篆隸無纖毫之失  
質人神無愧恥之心古今所疑坦然明白如其漏畧以俟

君子

十在文

代顧在  
詢作

興土木於禁中選驍雄於手下爰持斧鉞出鎮藩籬飾宮  
殿於遐方命鑿輿而遠幸爲釁之端爲禍之原有王承休  
在摧挫英雄吹揚佞媚全無才智繆處腹心斷性命於戲

玩之間戮仇讐於樞機之下有功勞而皆棄非賄賂而不  
行有宋光嗣在受先皇之付託爲大國之棟梁旣不輸忠  
又不知退恣一門之奢侈任數力之驕矜徒爲貪饕之人  
實非社稷之器有王宗弼在妄陟雲霄殊非譽謗興亂本  
則逞章程之妙恣奸謀則事頗舌之能心口傾危尚居左  
右有韓昭在性懷慘毒心恣貪殘焚爇軍營恢拓私第不  
顧喧騰於眾口惟思自任於忿懷有歐陽晃在酷毒害民  
市井聚貨叨爲郡守實負天恩瘡痍已徧於陽安蒙蔽半  
由於內密有田魯儔在爲君王之元舅受保傅之尊官但

務奢華不思輔弼第宅迴同於上苑金珠求滿於貪心有  
徐延瓊在出爲留守入掌樞機無諤謔以佐君但唯唯而  
徇旨有景潤澄在搜求女色取悅宸襟常叨不次之恩每  
冒無厭之寵敷對惟誇於便捷佐時不識於經綸素非忠  
勤實爲忝竊有嚴凝月在唱亡國之音銜趨時之侈每爲  
巫覡以翫聖明致君爲桀紂之昏使上乏唐虞之化有臣  
在陛下任臣如此何憂社稷不安

許寂

寂字閑閑樓四明山昭宗徵赴闕召對內殿尋請還山寓

居江陵唐末除諫官不起趙匡凝奔蜀寂偕行蜀主王建待以師禮位至蜀相同光末平蜀從王衍降授工部尚書致仕清泰三年卒年八十餘

上蜀主求賢書

厯代之君乘時啟運莫不博訪髦士詳求碩畫以武定禍亂以文致康義故軒皇命六相虞舜舉八元伯禹拜昌言成湯師一德周有多士文王以寧此厯代之大經求賢之極摯也今百辟之中有謀可以策國勇可以盪寇或博究治體或精知化源未擢穎於明廷尚舍光於庶位者伏望

恢明聖之畧開戶牖之圖親賜顧問以觀其能置之列位  
盡其獻納俾官無敗政人無滯才

謝信物書

右件鞍轡馬腰帶甲冑槍劍麝臍琥珀玳瑁金稜椀越瓷  
器並諸色藥物等皆大梁皇帝降使賜貺雕鞍撼玉堅甲  
爍金十圍希世之珍六轡絕塵之用槍森蛇榦劍耀龍鋒  
金稜含寶椀之光祕色抱青瓷之響上藥非蜀都所紀名  
香從外國稱奇遠有珍華竝由惠好顧酬謝而增愧仰渥  
澤以難勝捧閱品名實慙祇受

蜀答聘書

大蜀皇帝謹致書於大梁皇帝閣下 竊念早歲與皇帝共  
逢昌運同事前朝俱榮倚注之恩竝受安危之寄豈期王  
室如燬大事莫追橫流泛濫於八方衰釁凌夷於九廟此  
際與皇帝同分茅土共統邦家扶危者力既不宣握兵者  
計無所出某忝列同盟之分幸居平蜀之功所宜治兵甲  
以固封疆聚征賦以修進貢望星使而經年不至指雲鄉  
而就日無期遠聞皇帝應天順人開基立極拯生靈於塗  
炭示恩信於豚魚東南之王氣咸歸河洛之殊祥畢至四

門盡闢百度惟貞竟無意於興邦止施仁而濟物以此內  
量分限不在經綸七十州自可指揮八千里半因開拓遂  
至萬民叶議八國來朝爰徵史冊之文亦有變通之說且  
東漢亂離之後三國齊興西周微弱之時六雄競起俱非  
恃彊逼禪皆以行道濟時雍容於揖讓之前輕重於英雄  
之內况西蜀開山立國燒機爲謀稱雄雖處於一隅避狄  
曾安於二帝鼎峙之規模尚在山呼之氣象猶存永言梁  
蜀之懼合認弟兄之國今蒙皇帝遠尋舊好專降嘉音坦  
無間諜之嫌再敘始終之約款慮則春冰共泮開通則東

海可歸光榮遠被於子孫暢遂咸萼於草野今則盡焦勞而勵已用勤儉以師賢常瞻偃草之風以繼用天之道又蒙厚加賜貺別降珍奇十驥聯鑣六龍竝駕稱德曾參於萬乘呈才皆過於千金載觀戀主之心益勵懷恩之志寶帶輶異方之貢名香加遠國之珍奇鋒利過於雪霜雅器價齊於金玉入用多慙於未識捧持方喜於初觀望思而一日三秋仰德而跬步千里自此榮遵天路繼遣星槎誠章不候於飛鷺裂帛豈勞於繫雁忻榮慰嘉併集此時敬以專使盧卿等迴備陳所志幸望開覽謹白

欽定全唐文卷八百九十目錄

鄭藝

武德軍節度使徐延瓊德政碑

王鏗

王衍降表

上蜀主奏記

劉纂

請禁醉粧

蒲禹卿

諫蜀後主東巡表

應制科策

欽定全唐文卷八百九十

鄭藝

藝仕蜀後主爲翰林學士

武德軍節度使徐延瓊德政碑

臣嘗讀唐書竊覩太宗每以爲將致治平必先仁義得賢則理失人則危可鑒格言足徵邃古豈不以化馴易服威束難齊哉然農戰交修德刑共舉將亂也其政必驟將弊也其風必佻將圖九合之威亦賴五臣之佐苟虞害眾莫若任賢視今可以知昔矣高祖皇帝以汴賊弑君唐朝絕

嗣左袒罕聞其歸漢同聲皆倣於吠堯上下相蒙酣爲醉國寰區之內億兆無依競陳推戴之誠願正君臣之位難違眾欲遂啟不圖戡禍亂而俟中興協會盟而歸大國爲蜀之帝報唐之恩明孝皇帝受命之六年天清地寧珠連璧合肇修人紀於變時雍至若皇墳帝典之精河圖洛書之奧步驟於羲軒之際損益於文獻之間不然何其盡美盡善之如是也遂使蠻夷向化吳越輸珍麟鳳效祥草木呈瑞矧復英賢間出俊乂羅生上猶以爲未也方且思聖父勤求登用才哲循名責實較德論功沮勸有謀黜陟不

鑿乾締構允歸睿作之功壽國陶鎔必有挺生之佐式  
扶昌運對越上元由是中外文武將相公卿洎庶尹庶史  
各率厥職奉若天旨越正月武德軍將校吏民縗黃耆艾  
等列狀詣護軍使請以節度使徐延瓊德政上聞願勒碑  
紀且以借畱爲請上憂勤庶政以百姓爲心凝旒稱嘆者  
久之謂翰林學士藝曰朕司牧元元將開壽域使國內郡  
縣治行皆如梓潼朕何憂哉夫吏久於官古之道也况眾  
欲之乎朕旣俞其請矣卿爲我撫其懿實播無窮之聞以  
塞民望微臣奉詔恐懼敘曰臣聞龍飛九五山川效雲將

之靈鵬擊三千風水運波臣之化雖復同心同德雅資十  
亂之功乃聖乃神永賴八元之佐內則皋夔協贊外則方  
召專征神謀且貞師律具有兼膺注意宜屬宏材此我皇  
帝之御宇也不顯帝圖顧茲天力四神踐雪五老飛星投  
綸負鼎之賢爭伸宏業委輶請纓之士競奮深機蕙帳空  
而明月常孤蒲輪至而清風自激猗歟雖居宣武之間未  
若我朝得人爲盛也其或家連戚里身陟齋壇益揚謙損  
之風靡見驕矜之色功超賈鄧政邁黃韓有若武德軍節  
度使徐公斯可謂一時之英也公名延瓊字敬明東海剡

人卽國之元舅也世緒標奇門風襲煥鎮爲峯鼎用作雄  
鈐父子則貴比金張兄弟則政同魯衛騰八龍之聲價齊  
一鳳之羽儀阮竹皆芳田荆茲茂金相玉印各炫晨葩虎  
節獮壇共觀畫錦徒思徧舉抑亦倦譚公王父唐京兆武  
功縣令追贈尚書左僕射太師高平王政績頻彰勲華早  
振自激封侯之志夙垂濟世之名茲西晉殊功勞連邸第  
南朝雅望地顯官婚貽謀各著於承家致用皆光其佐命  
朱輪華冕豈獨推恩甲令門風實先種德是賢奕葉孰與  
提衡厯佐昌朝宜鍾異氣公中邱會秀大爽炳靈幼挺英

姿夙彰雅操稟說禮敦詩之教蘊經文緯武之才欲紹家  
聲遂參戎右敵國相吞之候決在毫釐陰符必勝之機制  
於掌握碉戈寶鼎門崇八命之榮玉帳金壇神授六韜之  
妙故能名高大國業嗣良弓輕鎮北之無文恨征南之不  
武圮橋靈叟謂謀畧之可傳汶水神翁知功名而必立自  
繼膺睿眷兩踐渙符四封無刁斗之音千里有袴襦之詠  
政成剖竹擁重執金掌領孤兒每警巡於晝夜扈隨大駕  
遠鎮定於邊陲繞復六飛將分雙節上以鄰城奧壤潼水  
名區粵自艱難久罹瘡痏獄市無寄杼軸皆空羣盜猖狂

幸寇恂之去日遺黎憔悴望郭汲之來時不有改張何其  
俾乂爰求賢帥式憊雄藩乃授公武德軍節度使公攬轡  
遄征下車畢理彈壓豪驚封殖疲癃究本尋源提綱振領  
害於人者雖大必去利於人者雖小必行嘗謂人曰法者  
政之要也不可不峻其隄防禮者教之本也不可不謹其  
律度食者民之命也不可不勤其稼穡兵者戰之器也不  
可不肅其號令率是四者盡其一心上可以翼衛朝廷下  
可以儀刑藩翰吾得之矣爾其觀焉公以管內數多亡命  
姑務偷生久聚萑苻常爲虺蜴狡穴皆依於窮谷妖巢各

恃於幽林化之不悛來而復叛郡邑虞其蹊蹠路歧苦於  
斂敷公密運良籌周旋峭格盡投私罟皆挾禍胎益其戎  
兵誠其強吏商旅無滯貢奉罔艱王尊申京兆之威冀遂  
去潢池之患勞徯罕倦蕩析咸歸動有常規賞無橫費上  
勤時貢下贍軍須月未及其授衣士已忻於挾纊賑其匱  
乏釋彼愁顏幸夜犬不驚宵魚自放哀矜庶獄慎恤惟刑  
赭衣盡伏其神明丹筆立分其情僞絕加等之聚斂革無  
名之征徭平衡不謬於錙銖嘉量罔欺於圭撮公又仰稽  
前古俯瞰遺蹤思棗祗闢地之謀味韓浩屯田之計膏腴

靡棄黍麥頻豐夢果應於牧人利可資於寡婦貢賦加倍  
獻奉相望又歲別進軍食因沃潤之鄉置牢盆之務商徒  
繁會官帑委輸檢吏通民機能制用矯時阜俗儉以率先  
貫天錢而已應星文認寶氣而已有雄劍闕來奏課連最

聞莊本可畱足表富人之術芊區難竝咸知濟物之方公  
以鳴社嘉辰繞樞令節祈聖壽有莊嚴之懇祝宗祧於降  
誕之期自捨俸金於惠義寺構華嚴大閣向者公府未完  
軍衛莫稱於是載修輪奐別創規模庭架虹梁門羅虎戟  
層樓燕賀偏增鼓吹之雄廣廈翬飛益動旌旗之色路當

衝要地控都畿使車晝夜以交馳候館往來而宿餉每傾  
公帑用飲賓筵休聲洽聞靈貺昭感紫芝三秀黃犧竝生  
天唯發祥地不愛寶迴掩得禾之異果符登麥之文歌德  
詠仁言將不足含和吐氣樂固難名大矣哉公之間俗觀  
風阜財述職焉可得而稱也爵賞旣行中外同喜遂冊拜  
中書令趙國公加食一千戶通前五千戶公獄降標奇星  
精稟異溫如圭璧郁若椒蘭智合韜鈴言無鉤距運籌決  
勝苟攸可比於良平仗鉞祓威謝艾足同於方召研幾昭  
禮植操資忠允武允文多材多藝軍中講學馬上註書揮

刀則立覩飛泉盤彌則惟聞折樹而又貴不自滿謙而益  
光饗士投膠延賓比飯帳下之犀渠貝胄咸感悅癱樓中  
之蟠首峨眉寧矜笑覽閨門密行簪組美譚里巷相觀風  
雲動色宸衷夙注寵詔已行致闔境之允諧固本朝之是  
衛况家豐懿戚治陟殊尤心膂連營蓄雷霆於北落股肱  
重鎮寄柱石於東川克副分憂合膺異渥宜其珉麗德臺  
檢圖功懋績著擁旄化行偃草比屋而乞留侯霸叫閣而  
願借耿純詎可使螭首翠碑未披文而相質麟臺彩筆不  
寫照以傳神臣志慕陽秋工非潤色仰遵睿旨敢述殊勲

曾無少女之詞豫怯中郎之鑒所冀陵遷谷變尚窺沈水  
之文地久天長永覩生金之字謹爲銘曰

金行啟運鼎業鑿乾麟御瑞紀鳳舞昌年層潤浩注國祚  
遐延光凝寶匣福靄祥編上詰繼文皇圖增煥得一踐義  
登三轍漢懿綱牢籠大鑪眞觀宗社還資微明接旦太虛  
寥寥中有元精麗物爲瑞麗人爲英英英徐公爲毗而生  
脂膏不染獄市無驚智勝兵強化行民附屢立奇功繼膺  
寵數帝念徐公聿齊其務迺睠梓潼并有饒賦公至若何  
時雨霧澑枯苗濯穎涸轍騰波摧奸禁暴利弊止訛襁負

而至動植興歌八政何先以食爲天卧鼓勤農免胄服田  
耒耜接肘臺笠摩肩閭閻靡稼穡雲連眾害旣去纖惡  
皆除頒宣化育慎恤刑書徽纏自朽圖常虛輕徭薄斂  
政協蒲盧老安少懷遠至邇肅風雨時若家給人足戶溢  
版籍賦登公牘儲峙孔多貢輸相屬神明之正誰爲之師  
公之俱美福祿攸宜位隆鳳詔恩注龍墀梓人頌德天子  
嘉之爰命荒墟奉揚馨烈揚子神疲江生思絕涪水東注  
銅山西揭帶礪無期永旌賢哲

王鍇

鍇字鱣祥天復時奉使西川因畱蜀官翰林學士遷御史  
中丞武成二年除中書侍郎同平章事後唐莊宗滅蜀入  
洛陽官刺史

王衍降表

臣先人受鍼坤維作藩唐室一開土宇垂四十年屬梁孽  
挺災皇綱解紐不能助逆遂至從權勉徇輿情止王三蜀  
固非獲已未有所歸逮臣纂紹罔敢怠遑自保土疆以安  
生聚陛下嗣唐虞之業興湯武之師廓定中區奄征不憚  
梯航畢集文軌大同臣方議改圖便期納款遽聞致討實

抱驚危今則委千里封疆盡爲王土冀萬家臣妾皆沐皇恩輿櫬有歸負荆俟罪望迴日月之照特寬斧鉞之誅容佇德音以安反側儻墳塋而獲祀實存沒以知歸臣無任望恩虔禱之至

上蜀主奏記

伏以羲皇演卦神農造書陶唐克讓是昌禮樂有虞濬哲乃正璇璣禹湯文武功濟天下故能卜世延遠垂裕無窮逮乎六國諸侯力征秦滅墳典以愚黔首遂使聖人糟粕掃地都盡漢承秦弊下武尊文蕭何入關唯收圖籍文帝

修學校舉賢良海內晏然興崇禮義景帝躬履節儉選博士諸儒以備顧問麟書鳳紀填溢於未央玉版金繩充物於祕府班固曰周稱成康漢稱文景宜哉武宣之世乃崇禮官開金馬石渠之署以議典禮樂置協律之官以分雅鄭公卿大夫間作於世或紓下情以通諷諭或宣上德以盡忠孝孝成之世奏御者千有餘篇獻納論思之盛夐古罕比世祖承喪亂之餘龍驤宛葉去暴誅亂拯溺救焚寬以用人明以率下兵革既息寰海乂寧乃起立太學招致鴻碩羣臣每有奏議必命史官撰集以傳後世數引公卿

講論經義夜分乃寐不以爲勞孝明師事桓榮躬親文墨  
朝誦夜講明達過人孝章崇尚文儒有太宗之遺風嘗於  
白虎殿會集羣儒推演乾坤考合陰陽上申聖人下述品  
物參於傳記內別六經若披浮雲而覩白日設華燈而入  
闇室詔元武司馬班固纂集其事名曰白虎通魏武博覽  
羣書特好兵法鈔畧書史名曰節要又注孫子十三篇尤  
好篇詠動爲典則文帝八歲能屬文博覽古今貫穿經史  
及居帝位益尚謙和坐不廢書手不釋卷晉宣博學洽聞  
服膺儒教當曹氏中微總攝百揆萬幾之暇未嘗廢卷景

文之間咸重儒術宋高祖豁達大度涉獵典墳討伐之中亦重文墨文帝博涉經史尤善隸書每識諸子率以廉儉南齊高帝深沈大量清儉寬厚嗜學好文曾無喜慍常曰學然後知不足余恨無老成人得與周孔比德兼善草隸有飛動之勢梁武該博多聞有文武之畧在位冬月秉火執筆手爲皴裂諸子悉有文藝聚書討閱晝夜忘疲元帝好易章編三絕東閣聚書十四萬卷象牌玉軸輝映廊廡陳武倜儻雄傑過人窮究兵書耽玩史籍文帝畱意經典舉動端雅後魏道武立臺省興儒學五經各置博士講問

如市塾序成林北齊有文林學館周武帝保定中書盈萬  
卷平齊所得纔至五千卷置麟趾殿學士以掌著述隋平  
陳之後牛宏分遣搜訪異書經史漸備凡三萬餘卷煬帝  
於東都觀文殿東西廂貯書寫正副各五十分爲三品除  
祕書所掌而禁中之書在焉唐高祖統一區宇剗革暴隋  
六合宅心四海歸德躬行仁義以息亂階太宗神睿聖文  
天資英武嘗在藩邸命博學之士房元齡杜如晦等一十  
八人爲秦府僚佐大較儒術廣聚經史及居帝位隨才擢  
用於是宏文館皆置學士元宗開元五年於乾元殿置修

書使召學士張說等讌於集仙殿東廊下寫四部書以充  
內庫麗正殿置修書使又召學士張說等讌於集仙殿改  
名集賢其修書使爲集賢殿學士自是圖籍不獨祕書省  
宏文崇文館皆有之集賢所寫則御書也分爲四部一曰  
甲爲經二曰乙爲史三曰丙爲子四曰丁爲集兩京各一  
本共二萬五千九百六十卷經庫書白牙軸黃帶紅牙籤  
史庫書青牙軸縹帶青牙籤子庫書紫檀軸紫帶碧牙籤  
集庫書綠牙軸朱帶白牙籤以爲分別以大學士專掌之  
歷代以來咸有祖述廢置沿革或有差異今但畧舉帝王

故事及祕書之職幸冀垂覽焉

劉纂

纂桐廬人一云長沙人唐左拾遺蛻子仕蜀厯任禮部尚書國亡復事孟氏

請禁醉粧

下之從上如風偃草以仁義理法化之則爲謹愿之行以驕奢淫佚化之則爲狂薄之俗今一國之人皆效醉粧臣恐邦基頽然如人之醉而不可支持也

蒲禹卿

禹卿成都人蜀乾德四年對策擢右補闕出爲秦州節度判官國亡從後主入洛陽後主被誅題詩驛門逃去不知所終

諫蜀後主東巡表

臣禹卿頓首死罪臣聞堯有敢諫之鼓舞有誹謗之木湯有司過之士周有戒慎之韁蓋古者明君克全帝道欲知己罪要納讜言將引咎而責躬庶理人而修德陛下自承祧秉籙正位當天愛聞逆耳之忠言每許犯顏而直諫且先皇帝許昌振跡閬苑興師厯艱辛於草昧之時受危險

於虎爭之際胼胝戈甲寢寐風霜申武力而助中原立戰功而平多壘亡軀致命事主勤王方得成家至於開國今日鴻基霸盛大業推崇地及雍岐界連荆楚信通吳越威定蠻陬郡府頗多闢河甚廣人物秀麗土產繁華當四海輻裂之秋成萬代龍興之業陛下生當富貴坐得乾坤但好歡娛不思機變臣欲望陛下以名教而自節以禮樂而自防修道德之規受師傅之訓知社稷之不易想稼穡之最難惜高祖之基模似太宗之臨御賢賢易色孜孜爲心無稽之言勿聽弗詢之謀勿用聽五音而受諫以三鏡而

照懷少止宿於諸處林亭多厯覽於前王書史別修上德  
用卜遠圖莫遣色荒無令酒惑常親政事勿恣閒遊臣竊  
聞陛下欲出成都看於邊壘且天雄地遠路惡難行險棧  
欹雲危峯插漢稍雨則吹摧閣道微泥則阻滑山程豈可  
鳴鑾唯堪叱馭又復秦州敵境咫尺塞邑荒涼人雜羌戎  
地多疫瘴別無風華異境不可選勝尋幽隴水聲清邊笳  
韻咽營中只帶甲之士城上宿枕戈之人看烽火於孤峯  
朝朝疑慮覩望旗於絕嶺日日隄防是多山足雲之鄉卽  
易動難安之境麥積崖無可瞻戀米谷峽何足聞知縱過

嗟山須通怨水秦穆圉馬之地隗囂僭位之邦其次一人  
出行百司參從千羣霧擁萬眾星馳當路州縣凋殘所在  
館驛隘小止宿尚猶不易供需固是極難縱若宮中指揮  
自破屬省錢物未免因依擾踐觸處凌持以此細論不合  
輕動其類蒼龍出海雲行雨施豈合浪靜風恬必見傷苗  
損物所以鑾輿須止天步難移况頃年大駕只到山南猶  
不下關進發兵士此時直至天水未審制置如何當初打  
破梁原城池幽掠義寧戶口截腕者非一斬首者倍多匪  
惟生彼人心而亦損茲聖德今去洛京不遠復聞大駕重

來彼則預有計謀此則便須征討况鳳州久爲讐敵必貯  
姦謀切慮妄指妖詞致生釁隙又陛下與唐國方申歡好  
信幣交馳但慮聞道聖駕親行別懷疑忌其事專差使命  
請陛下境土會盟未審聖躬去與不去若去則須似秦趙  
爭強彼此難屈若不去則便同魯衛不睦戰伐滋興酌彼  
未萌料其先見願陛下思忖臣伏聞自古皇帝省方巡狩  
弔民伐罪展義觀風然後便歸九重別安萬姓陛下累曾  
遊厯未聞一件教條止於踐履山川驅馳人馬闖苑則舟  
船幾溺青城則嬪媒將沈自取驚憂爲何切事及還京輦

竝不說於軍民迫鬱眾情莫彰帝德憶昔先皇帝在日未  
有無故巡遊陛下纂承已來樂意頻離宮闈此時依前整  
蹕又擬遠別宸居昔秦王之鑾駕不迴煬帝之龍舟不返  
陛下聖逾秦帝明勝隋皇且無北築之虞焉有東遊之弊  
陛下寬仁大度廣孝深慈知稼穡之艱難識古人之成敗  
自防得失不縱襟懷豈忍致却宗祧閼二字道斷使烝民以

何託令慈母以何辜若不慮於危亡實恐乖於仁孝况玉  
京金闕寶殿珠樓內苑上林瑤池瓊圃香風滿檻瑞露盈  
盤鈞天之樂奏九韶迴雪之舞呈八佾簇神仙於紫禁耀

珠翠於皇宮如論萬乘之君便是三清之境人間勝致天下所無時或追遊足觀奇趣何必顧於遠塞看彼荒山不惜聖躬有何裨益方今中原有人大事未了但當國生靈受敝盜賊橫行縱邊庭無烽火之虞而內地有腹心之患陛下千年膺運一國稱尊文德武功經天緯地孝逾於舜仁甚於湯百行皆全萬幾不撓聰明博達識度變通深負規模獨懷英鑒方居大寶正是少年旣承社稷之基復抱山河之險何不視遠聽察居安慮危闢四門以求賢總萬幾而行事咸修一德端坐九重使恩威茲行賞罰必當平

分兩路徧療瘡痍庶表裏寬奢保子孫昌盛布臨人之惠  
化蓋救物之元功選揀雄師思量大計振彼鴟張之勢壯  
茲虎視之威秣馬訓兵豐糧利器彼若稍有微釁此則直  
下平吞正取時機大行王道自然百靈垂祐四海歸仁眾  
心成城天下治理今則蜀都強盛諸國不如賢士滿朝聖  
人當極臣願百姓樂於貞觀萬乘明於太宗採藥石之言  
聽芻蕘之說愛增社稷醫療君民同武王諤諤而昌鄙商  
紂唯唯而滅無飾非拒諫之事有面折廷諍之人固我春  
朝保我皇化陛下莫見居人稠疊謂言京輦繁華蓋是外

都凌殘住止不得所以競來湊集暫且偷安今諸州虐理  
既多百姓失業欲盡荒田不少盜賊成羣伏乞陛下稍布  
腹心卽當聞見蜀國從來創業多乏永謀或德不及於兩  
朝或祚不延於七代劉禪俄降於鄧艾李勢遽歸於桓溫  
皆謂不取直言不恤政事不行王道不念生民以至國亡  
人心何保山河之隘不足爲憑陛下至聖至明如堯似舜  
豈後主而相匹豈子仁而比倫有寬慈至孝之名有遠見  
長明之策不信倡媚不耽荒淫出入而所在防微動靜而  
無非經久必致萬年之業終爲四海之君願陛下且駐鑾

輿莫離京國候中原無事八表來王天下人心咸歸我主  
若羣流赴海眾蟻慕糞有道自彰無思不服匪惟要看天  
水直可便坐長安是微臣之至懇舉國之深願也臣聞昔  
者天子有爭臣七人雖無道不失其天下是以輒傾丹懇  
仰諫聖明不藉官榮不謀名譽情非訕上理切愛君雖無  
折檻之能但有觸鱗之罪不避誅殛爰叩天庭臣死如萬  
類之中去一螻蟻陛下或全無忖度須向邊陲遺聖母以  
憂心令庶寮以懷慮全迷得失自取疲勞倘有不虞悔將  
何及臣願陛下稍開諫路微納臣言勿違聖后之情且允

國人之望俯存大計莫去邊陲干犯冕旒無任憂惕冒死待罪激切屏營之至謹奉表直諫以聞臣某誠惶誠恐頓首頓首死罪死罪謹言

應制科策

今朝廷所行者皆一朝一夕之事公卿所陳者非乃子乃孫之謀暫偷目前之安不爲身後之慮衣朱紫者皆盜跖之輩在郡縣者皆狼虎之人姦佞滿朝貪淫如市以斯求治是謂倒行

欽定全唐文卷八百九十一 目錄

新文馨出版社藏書

徐光溥

上後蜀高祖請行墨制疏

賈鶴

判彭州人請歸醋頭僧狀

歐陽彬

哀帝降表

田淳

諫用兵疏

金文全集卷之二  
諫蜀後主疏

革縠

才調集序

歐陽炯

花間集序

張武

靈石碑

彭曉

周易參同契分章通真義序

參同契通真義後序

李昊

代後蜀主孟昶降表

上皇太子稱呼疏

爲孟知祥答唐明宗奏狀

創築羊馬城記

辛寅遜

諫孟昶擊球馳騁疏

欽定全唐文卷八百九十一

徐光溥

光溥蜀人仕後蜀爲觀察判官進翰林學士後主時兼兵部侍郎廣政十一年改中書侍郎兼禮部尚書同平章事尋罷相卒

上後蜀高祖請行墨制疏

我蜀被山帶江足食足兵實天下之強國也我公本仁祖義允武允文乃天下之賢主也以我公之賢拓土開封取威定霸固得其宜矣而况內則有紅蓮上客參帷幄之謀

外則仗細柳將軍專斧鉞之任率土之內足可保磐石之固泰山之安顧惟冗賤何補高明但念智者百慮必有一失愚者百慮必有一得狂夫之言聖人擇之樵童之歌哲王聽焉竊以惟賞與刑國之利器懲惡勸善君之要權不可偏行尤須具舉厯觀往典備考前規或王命而不通或公室以多難列國率聞於專制諸侯或可以從權苟有利於生靈又何辭於通變昔來歙鄧禹擅命於征伐之間蜀主岐王承制於隔絕之間事俱非已實欲安人昨鄰近諸藩間謀上國有虎視狼貪之意阻君臣魚水之歡添益兵

師動搖生聚况我公恒修貢職不虧楚子之茅遽構讒邪  
竟擲曾參之杼以至兩川歟血合從連橫列校齊心奉辭  
伐罪今則旋平狡穴漸拓鴻基立功者悉望昇榮向化者  
皆思敘進方屬路途有阻恩信未通二星不見於雲霄三  
蜀久憊於雨雪將期勸善切在報功酬庸合議於策勲列  
爵宜遵於故事自今以後若且行墨制以布鴻恩式副羣  
情無虧大體先宜曉諭後可施行所冀設爵待功免授逾  
時之賞允協稱霸之宜

賈鶚

鴟青社人仕後蜀爲御史明德元年爲彭州倅權刺史事

判彭州人請歸醋頭僧狀

出家長頭未除煩惱爲衣挂像豈敬慈尊向禪室以邪淫  
發妖言而惑眾妄裁厯數上侮朝廷謾述災殃下迷聾俗  
况今有漏未證無生將修功德以爲名積聚私財而作賈  
但以正人息事君子含宏未議剪除致茲猖熾所嗟鄙俚  
競言妖稱列狀詣衙欲希迎請須行嚴令以絕風情所由  
入界把捉候到決脊

歐陽彬

彬字齊美衡州衡山人仕蜀爲翰林學士王氏亡復仕後蜀廣政初累官尚書左丞出爲寧江軍節度使十五年卒

哀帝降表

臣聞滄海澄波納百谷朝宗之水皇風扇物來萬邦向化之人蓋由負罪不誅銜冤獲免鄭伯沐焚棺之惠許男荷解縛之仁得不頂戴穹旻仰祈渥澤恭惟皇帝陛下承乾啟運握鏡開圖發機而上應天心恤物而下從民欲斷十八祚崇隆之德高步泰階應一千年挺特之風廣施王道混車書於天下走聲教於域中而臣僻在遐方遠居蜀部

承先父經營之業爲巴人主者之司但荒聾瞽之迷罔顧  
危亡之患玉帛旣乖於正朔包茅是闕於薦羞殊不知唐  
德惟新元功再造致王師之遠辱勞雄武以遐臨太陽出  
而冰雪自消睿澤敷而黔黎盡泰而臣自知罪釁不敢逭  
逃命戎士以倒戈挈壺漿而塞路遂卽昇棺麾下束手馬  
前向丹闕以馳魂掩黃沙而聽命豈謂魏王布惠真宰垂  
仁入臣境無犯纖毫問臣罪不加一二推陛下好生之旨  
闡堯天宥惡之文釋殘生於撲蛾之燈全必死於戲魚之  
鼎使肌骨重生於聖日憔枯再沐於天波然則盡節輸誠

安足以贖臣之罪塗肝碎膽不足以報君之恩幸得捧日  
傾心歸明向化積懼而鋒鋩聚背推忠而丹赤貫心今則  
已遠龜城將趨鳳闕雖亡家國喜歸有道之朝縱別鄉園  
幸在太平之化臣以正月二日與母親并姨舅兄弟骨肉  
等發離當道奔赴京師攀望聖慈無任瞻天仰德惶懼戰  
越死罪之至

田淳

淳成都人後蜀廣政中官龍游令

諫用兵疏

伏見三年以來民頗怨嗟謂陛下求賢失道爲政不平重  
纂組奪女工貴雕鏤損農事法令不信賞罰無誠納諫之  
心微自滿假馭朽之念漸乖始卒載舟覆舟不可不懼而  
况北有大敵方藉支禦若失人心其何以濟臣又見頻發  
士卒遠戍邊庭人心動搖莫測其故家構異議如臨湯火  
人且憂駭將何撫寧若夫舉衆興師須明利害况關大事  
豈可容易必若金鼓一鳴前鋒稍接一敗一成疾如反掌  
願陛下先事而計無貽後患今之動靜頗涉因循臣不知  
所發之兵爲防邊乎爲赴敵乎若云防邊不當驟有徵發

若云赴敵則須先決便宜師出無名三軍必怨三軍既怨  
何以成功以我朝之甲兵擬柴氏之士馬以我朝之將領  
比柴氏之師帥以我朝之帑藏比柴氏之囷廩至於法律  
刑名聲明文物彼長此大差等不同須用權奇以謀拒捍  
若二國交鬪恐未十全况我天府之邦用武之地一夫守  
隘萬旅無前假使柴師能於野戰攻城奪壘利在平川儻  
入隘途如無手足願陛下以短兵自固扼塞要衝分布腹  
心把斷細徑精加號令老彼敵師縱柴氏親來未敢便謀  
深入以日繼月以月繼年敵勢自羸我師彌銳不折一戟

不失一卒而柴氏自疲信所謂彼竭我盈以逸待困此爲上計符合天機

諫蜀後主疏

今甲子欲交陰陽變動天運人事合有改更如采厚斂之末議必亂經國之大倫此犯天意者一也太乙所行將離分野初來爲福末去爲謹轉災作福是宜早圖若更倍賦加租則將有不測之禍此犯天意者二也四海財貨盡屬至尊散在民間積爲資產或有科索誰敢抵抗陛下何不舍其小畜以成大有乎此損君道者一也夫百姓六軍之

主也百姓足則軍莫不足百姓不足軍孰與足務奪百姓專贍六軍此其損君道者二也

韋縠

縠仕後蜀累遷監察御史戶部尚書

才調集序

余少博羣言常取得志雖秋螢之照不遠而雕蟲之見自佳古人云自聽之謂聰內視之謂明也又安可受誚於愚齒取譏於書厨者哉暇日因閱李杜集元白詩其間天海混茫風流挺特遂採摭奧妙并諸賢達章句不可備錄各

有編次或閑窗展卷或月榭行吟韻高而桂魄爭光詞麗而春色鬪美但貴自樂所好豈敢垂諸後昆今纂諸家詩歌共一千首每一百首成卷分之爲十目曰才調集庶幾來者不謂多言他代有人無嗤薄鑒云爾

歐陽炯

炯蜀人仕後蜀厯官武德軍判官翰林學士中書舍人

花間集序

鏤玉雕瓊擬化工而迥巧裁花剪葉奪春豔以爭鮮是以唱雲謠則金母詞清挹霞醴則穆王心醉名高白雪聲聲

而自合鸞歌響遏青雲字字而偏諧鳳律楊柳大堤之句  
樂府相傳芙蓉曲渚之篇豪家自製莫不爭高門下三千  
玳瑁之簪競富樽前數十珊瑚之樹則有綺筵公子繡幌  
佳人遞葉葉之花牋文抽麗錦舉纖纖之玉指拍按香檀  
不無清絕之辭用助嬌嬈之態自南朝之宮體扇北里之  
倡風何止言之不文所謂秀而不實有唐已降率土之濱  
家家之香徑春風寧尋越艷處處之紅樓夜月自鎖常娥  
在明皇朝則有李太白應制清平樂詞四首近代溫飛卿  
復有金筌集邇來作者無愧前人今衛尉少卿趙崇祚以

拾翠洲邊自得羽毛之異織綃泉底獨殊機杼之功廣會  
眾賓時延佳論因集近來詩客曲子詞五百首分爲十卷  
以炯龐預知音辱請命題仍爲序引乃命曰花間集將使  
西園英哲用資羽蓋之歡南國嬋娟休唱蓮舟之引

張武

武石照人仕蜀累遷峽路應援招討使入後蜀加秩侍中  
統飛棹諸營爲峽路行營招收討伐使卒年八十餘歲

靈石碑

夫禎祥應見事著前聞期至聖之效徵爲有年之先兆備

傳故實預保時康武唐大順己酉歲以伐叛勤王之忠忝  
專城剖竹之寄時茲石出焉去夏復領魚符再莅巴蜀值  
岷涪澄徹瑞應重覩內循薄德寧契殊祥但荷天休遂刻

貞石

彭曉

曉字秀川永康人後蜀廣政初授朝散郎守尚書祠部員  
外郎善修煉養生之道別號真一子

周易參同契分章通真義敘

按神仙傳真人魏伯陽者會稽上虞人也世襲簪裾惟公

不仕修真潛默養志虛无博贍文詞通諸緯候恬淡守素  
唯道是從每視軒裳如糠粃焉不知師授誰氏得古文龍  
虎經盡獲妙旨乃約周易撰參同契三篇又云未盡纖微  
復作補塞遺脫一篇繼演丹經之元奧所述多以寓言借  
事隱顯異文密示青州徐從事徐乃隱名而註之至後漢  
孝桓帝時公復傳授與同郡淳于叔通遂行于世公撰參  
同契者謂修丹與天地造化同途故託易象而論之莫不  
假借君臣以彰內外敘其離坎直指汞鉛列以乾坤奠量  
鼎器明之父母係以始終合以夫婦拘其交媾譬諸男女

顯以滋生析其陰陽導之反復示之晦朔通以降騰配以  
卦爻形於變化隨之斗柄取以周星分爲晨昏昭諸刻漏  
故以乾坤爲鼎器以陰陽爲隄防以水火爲化機以五行  
爲輔助以真鉛爲藥祖以元精爲丹基以離坎爲夫妻以  
天地爲父母互施八卦驅役四時分三百八十四爻循行  
火候運五星二十八宿環列鼎中乃得水虎潛形寄庚辛  
而西轉火龍伏體逐甲乙以東旋易曰聖人有以見天下  
之赜而擬諸其形容象其物宜公因取象焉非天下之至  
通其孰能與於此哉乃見鑿開混沌擘裂鴻蒙徑指天地

之靈根將爲藥祖明視陰陽之聖母用作丹基泄一氣變化之元漏大治生成之本非天下之至達其孰能與於此哉其或定刻漏分晷時簇陰陽走神鬼蹙三千六百之正氣回七十二候之要津運六十四卦之陰符天關在掌鼓二十四氣之陽火地軸由心天地不能匿造化之機陰陽不能藏亭育之本致使神變無方化生純粹非天下之至明其孰能與於此哉契云混沌金鼎白黑相符龍馬降精牝牡襲氣如霜馬齒如玉犬牙水銀與姹女同名朱汞共嬰兒合體明分藥質細露丹形盡周已化之潛功大顯未

萌之朕兆非天下之至神其孰能與於此哉其有假借爻象寓此事端不敢漏泄天機未忍祕藏元理是以鋪舒不已觀縷再三欲罷不能遂成篇軸蓋欲指陳要道汲引將來痛彼有生之身竟作全陰之鬼非天下之至仁其孰能與於此哉復有通德三光游精八極服金砂而化形質餌火汞以鍊精魂故得體變純陽神生真宅落三戶而超三界朝上清而登上仙非天下之至真其孰能與於此哉曉所分眞契爲章義者蓋以假借爲宗上下無準文泛而道正事顯而言微後世議之各取所見或則分字而義或則

合句而牋不無畎澗殊流因有妍媸互起末學尋究難便洞明旣首尾之議論不同在取舍而是非無的今乃分章定句所貴道理相黏合義正文及冀藥門附就故以四篇統分三卷爲九十章以應陽九之數名曰分章通真義復以朱書正文黑書旁義而顯然可覽也上卷分四十章中卷分三十八章下卷分十二章內有歌鼎器一篇謂其詞理勾連字句零碎分章不得故獨存焉以應水一之數喻丹道陰陽之數備矣復自依約真契撰明鏡圖訣一篇附於下卷之末將以重啟真契之戶牖也曉因師傳授歲久

畱心不敢隱蔽元文是用課成真義庶希萬一貽及後人  
也昌利化飛鶴山真一子彭曉敘

參同契通真義後序

參同契者參雜也同通也契合也謂與諸丹經理通而契合也凡修金液還丹先尋天地混元之根次究陰陽分擘之象明水火相克復爲夫妻認金水相生反爲父子故有男兼女體則鉛內產砂女混男形則砂中生汞日者陽也日中有烏陽含陰也月者陰也月中有兔陰含陽也此天地顯垂真象令達者則之可謂真陰陽也復有陰陽反復

之道水火相須之理造化生成之徑既知其徑須原其根  
根者則天地混元之根也既得其根須取其象象者則陰  
陽分擘之象也既得其象須循動靜既循動靜須知其數  
既知其數須依刻漏既依刻漏須明進退既明進退須分  
龍虎既分龍虎則南北之界定矣金木之形全矣大道之  
丹成矣復有內外法象內外水火有壇竈焉有鼎室胞胎  
焉有爻象焉有水火之候焉有抽添之則焉有擣駕之模  
範有離合之形體此皆頭頭俱備闕一不可志士又須徹  
聲色去嗜慾棄名利投靈山絕常交結仙友隱密曹溪晝

夜無怠方可期望或不如是則虛勞勤爾故陰真君曰莫辭得失一志而修還丹可冀也時孟蜀廣政十年歲次丁未九月初八日昌利化飛鶴山真一子彭曉敘

李昊

昊字穹佐自言唐相紳之後少隨父籍關中昭宗時以亂流寓新平蜀武信軍節度使劉知俊署爲從事後主時厯翰林學士蜀亡入後唐授檢校兵部郎中奉詔偕趙季良至蜀後蜀主辟爲觀察推官遷掌書記及開國擢禮部侍郎翰林學士後主立領漢州刺史累拜門下侍郎兼戶部

尚書同平章事封趙國公加司空領武信軍節度使國亡入宋拜工部尚書卒年七十五贈右僕射

代後蜀主孟昶降表

臣生自并門長於蜀土幸以先臣之基構得從幼歲以纂承只知四序之推移不識三靈之改卜伏自皇帝陛下大明出震聖德居尊聲教被於遐荒慶澤流於中夏當凝旒正殿虧以小事大之儀及告類圜丘廣執贊奉琛之禮蓋蜀地居遐僻路阻闢庭已慙先見之明因有後時之責今則皇威電赫聖畧風馳干戈所指而無前鼙鼓纔臨而自

潰山河郡縣半入於提封將卒倉儲盡歸於圖籍但念臣中外骨肉二百餘人高堂有親七十非遠弱齡侍奉只在庭闈日承訓撫之恩粗勤孝養之道實願克終甘旨保此衰年其次得子孫之團圓守血食之祭祀伏乞皇帝陛下容之如地蓋之如天特軫仁慈以寬危辱臣復輒徵故事上贊嚴聰竊念劉禪有安樂之封叔寶有長城之號皆因歸歟盡獲全生顧眇昧之餘魂得保家而爲幸庶使先臣寢廟不爲樵採之場老母庭除尚有問安之所見今保全府庫巡邊軍城不使毀傷將期臨照臣昶謹率文武見任

官望闕上表歸命

上皇太子稱呼疏

按漢書諸侯王上疏稱陛下應劭釋云陛者升堂之陛王者必有執兵陳於陛階之側羣臣與至尊言不敢指斥故呼在陛下者而告之因卑以達尊之意若今呼殿下閣下侍者足下執事之類是也臣等以爲凡上牋皇太子合連殿下呼之若等候起居祇合稱皇太子萬福其前導者亦祇呼皇太子來不宜呼殿下來詳殿下陛下之稱顯是指陛下之下他人也今若言殿下來卽是他人來請百官起

居祇稱皇太子萬福前導者呼皇太子來

爲孟知祥答唐明宗奏狀

伏以故東川節度使董璋與臣爲鄰從初不睦常厚誣於表疏每深間於朝廷欲竊兵權來并土宇及審聖聽不惑物論難從臣合此時奮激驍雄誅殛奸宄尋屬陛下翠華外駐黃屋未安捨亦何傷剋之不武用是益勞宵旰因議寢停雖隱忍以累年且參商而終日其後故臣安重晦特承君寵恣弄國權窺劍外之有萌示寰中之無畏開一料聖君之意必推亡以固存其如偉臣之言恐怒眾而難犯

臣與董璋愛以暫合和而不同雖玉帛之交馳豈心貌之相類誠知蘊蓄且務包容儻敢飛颺必當掃殄其董璋至今年四月二十八日暴興兵甲五月一日驟入漢州臣其日先差昭武軍節度兵馬留後兼左廂步軍都指揮使趙廷隱總領三萬人騎發次新都臣自統領衙內親軍二萬人騎繼之俱列營於彌牟鎮北至三日詰旦結其大陣俟勦元克其董璋至午時敢領妖徒來當鋒銳臣則親驅戈甲趙廷隱手奮鼓旗一擊而魚潰鳥離四合而豕分蛇斷斬首一萬餘級執俘八千餘人生擒賊中都指揮使元瓊

衙內副都指揮使董光演及以下指揮使都頭八十餘員  
奪下甲馬五百餘匹收獲衣甲器械十萬餘事其餘逆漏  
之徒尋令搜捉并盡其董璋只與親男衙內都指揮使董  
光嗣并從騎二人罄馬而奔棄甲而遁撫隻輪而掩泣視  
亂轍以咸哀烏江之死所不遼赤壁之慙顏更厚臣幸以  
疾雷之勢破其急電之機臣便統領大軍壓背追襲其董  
璋至四日已時走入棗川至午時有前陵州刺史王暉知  
稟巢之已傾驗城池之不守梟斬董璋父子首級相次迎  
獻軍門徑進師徒收下城壘平定一方之眾止於四日之

間莫不遐仗皇威戡除隣穢、屢方以自違君命未達臣誠捷音雖審其風馳奏疏未遑於羽插豈謂皇帝陛下才聆動靜遽軫憂勞遙降使臣特頒明詔諭董璋之奸罪勉微臣以削平仍勅軍前俾施掎角並得暗合方畧顯應神機更無脅齒之虞永荷股肱之寄

創築羊馬城記

粵若蠶叢啟國魚鳧羽化於湔山望帝開基鼈靈復生於岷水然則疏鑿巫峽管鑰成都而猶樹木柵於西州跨土田於南越其後兼并梁漢睥睨巴賓獵騎奔馳會秦王於

褒谷石牛來去闢蜀路於劍門空驚化玉之微寧獲冀金  
之利爰自朔分秦厯聲接華風代有雄豪迭爲侯伯運當  
奇特子陽乘虎踞之機時遇非常元德負龍蟠之勢若迺  
張儀之經營版築役滿九年楊秀之壯觀崇墉功加一簣  
洎我唐臨御聖德昭融武威雷駭於百王文德日輝於四  
海惟茲益部扼彼邛關蒙王肆猾夏之心坦綽苞亂華之  
志時或窺吾卧鼓覘我韜戎彎弧學射之山飲馬沈犀之  
水玉帛子女漂流鑿齒之鄉珠翠綺羅散失雕題之域累  
朝是忘逸樂深軫殷憂夢卜良臣控彈巨屏南康王以儒

術柔服教習詩書燕國公以將畧威懷淬磨斧鉞息波瀾  
於錦水剏制度於羅城踰百雉之恒規補一隅之闕事有  
備無患庇蜀人以金墉避狄蒙塵安僖皇之玉輦雲巒稽  
額遣使來朝航滇河以獻珍越沈黎而納款當廟社阽危  
之際鑾輿出狩之秋坐制南荒終無北寇乃燕公之力也  
往以元穹告變天祿中微夷門方轉其斗魁王氏遂分其  
鼎足既而莊宗繼絕皇祚中興靈旗西指於巴庸蜀主東  
朝於伊洛先帝以初復地土方懷遠人須仗權謀迺睠勲  
戚於是詔飛丹鳳召何晏於并門節立蒼龍封杜悰於井

絡卽我太尉侍中平原公分茅金闕受瑞彤廷帳移竹馬  
之邦輪輶木牛之路星馳十乘霧廓三川宣皇風於上事  
之初慰人望於下車之日且以城邑自經剋復勢尚搖搖  
公來如太華之安帝寄得磐石之固益民多福而遇賢侯  
公曠度涵空英風曠古襲門胄則重侯累將保勲榮則帶  
河礪山會族而象簡盈牀奕葉而貂冠滿座其爲盛也無  
得名焉頃者以龍戰元黃虎爭區夏殺氣晝昏於日月陣  
雲宵蔽於星辰天柱傾欹海波動蕩鼓鼙未息干戈日尋  
公是時幹運璇樞端持瑤鏡贊神謀於不測斷人事以無

疑獻替經綸折衝樽俎決勝廟堂之上制敵掌握之間借  
筋爲籌舉無遺算內則翊戴天子外則承寧諸侯言正色  
莊有犯無隱成少康祀夏之德彌光武興炎之功再造巨  
唐削平新室厯數允集神器知歸皆由公協和元勲光輔  
洪業是知取威定霸崇文教以興隆安上治民修理容而  
鎮靜足以神交旦奭士撫平參力致大同宜亨廣運以之  
首揚紅旆式遏錦川古有遺機待乎作者公臨鎮之始年  
中興之四載也歲在丙戌春正月十有一日杖鉞而至無  
何期月逆帥康延孝自普安竊兵叛亂矯詔窺覬犯我鹿

頭營於雒縣勢將率眾必寇近郊公曰清野待敵於民何罪堅壁而守謂我無謀况城雖大而弗嚴隍已平而可涉衆情憂惄公意晏如飛羽檄以會兵伐林木而立柵森然棨戟密爾橫簫環以深溝屹如斷岸五日之內四面尋周民一其心士百其勇於是精選將領分部熊羆電激妖巢火熏狡窟一鼓而元兇氣喪載攻而同惡疲頽擒鄧艾於輜中斬龐涓於樹下長蛇碎首封豕析骸獻捷功於王廷掃逋穢於侯甸一除芽蘖大定疆陲公於是提振紀綱恢宏典法六條已正七德兼修言出令行家至日見未幾先

皇厭世今上纂圖聖政惟新睿思求舊不改山河之寄永  
繫社稷之臣一年而加珥貂再歲而昇掌武將軍幕下列  
虎豹之爪牙丞相府中排鴻鵠之腹背猶且爵盈而不飲  
肴乾而不食診療生靈討論獄訟固以忠爲令德孝出因  
心力奉國家勤修職貢賈紫紱於劍棧包茅旁午於玉  
京史不絕書府無虛月閱其庭實標出羣芳推晉文尊獎  
之誠詔齊桓糾合之業天子得以居南面之貴銷西顧之  
憂萬里長城岌然存矣公一旦謂諸將吏曰夫華陽舊國  
宇內奧區地稱陸海之珍民有沃野之利郛郭則樓臺疊

映珠碧鮮輝江山則襟帶牽連物華秀麗間間碁布廊陌  
駢羅不戒嚴陴是輕武備耳亂臣賊子何嘗不窺南詔西  
羌會聞入寇將沮豺狼之意須營羊馬之城吾已揣之眾  
宜協力封章上奏揆日量工分界繩基辨方畫址百城首  
壯呼之響答以雲來十萬貔貅令之風行以霧集杵聲雷  
震版級雲排玉猛鬻畚於城隅傅說飛鑿於巖下公間日  
巡撫役者忘疲周給米鹽均頒牢酒如效五丁之力纔踰  
三旬而成克就厥功不憊於素遠而望也象羣山之迤邐  
俯而瞰也若峭壁之斗懸掘大壕以連延增長隄而固護

鷙鳥搏兮可越武夫勇兮莫干摩壘者諒之摧心守陴者  
由之示暇舊城崢嶸而後竦新城巖業以前蹲勢而言之  
若泰獄之與梁甫亞而稱矣若夫子之與顏回重門開而  
洞深危樓亘而翼展至若八月之江澄寒碧七星之橋架  
晴虹偉乎津梁成茲壯麗公以羅城雖設智有所虧重築  
大敵鎮於四角欽岑桂兔突屼栖烏儼樓櫓於汎寥懸刀  
斗於天表其東南也直分象耳迴眺蛾眉雲霞斂吳楚之  
天煙水送黔夔之棹其西南也旁連玉壘平視金隄宵瞻  
火井之光曉望雪峰之彩其東北也樹遙雲頂氣鬱金堂

雨收而豐嶂屏新靄薄而重巒晝暗其西北也襟袖廣漢  
肘腋天彭魚龍躍萬歲之池鸞鶴舞陽平之化其或碧雞  
啼曉金馬嘶風擁旄戟以登臨覩山川之形勝有以見公  
心同軒鏡竄孽鬼神手秉漢鈞錙銖造化能於昭代樹此  
豐功鄙金甌爲漏卮小鐵甕爲凡器其興也已當農隙其  
罷也不害農時帝旨咨嗟王綸獎錄詔書勅知祥省所奏  
重修葺當府城池已取十二月一日興功事具悉卿寵分  
玉節榮鎮錦城守富貴以無疆慕功名於不朽特峻金湯  
之固以威蠻貊之邦况屬年豐復當農隙旣暫勞而永逸

尤豫備於不虞益見廟謀允符朝寄省閱陳奏嘉歎殊深  
公猶歸善於君讓功於下諸軍馬步軍都指揮使光祿大  
夫檢校太保守彭州刺史上柱國李仁罕左廂馬步軍都  
指揮使金紫光祿大夫檢校司空守漢州刺史上柱國趙  
廷隱右廂馬步軍都指揮使金紫光祿大夫檢校司空守  
簡州刺史上柱國張知業等家傳義烈世襲丕勳拓弓而  
霹靂聲乾揮劍而魚麗陣破曹景宗鼻頭火出薛延陀鬚  
尾煙生英毅無儔智謀咸博左都押衙金紫光祿大夫檢  
校司空守蜀州刺史上柱國潘在迎等或鼎鐘盛族或書

劍名門佩鞬執弭以從戎憑軒輊而佐理至於華皓不  
墜忠勞是能領袖雄藩表儀會府而皆躬臨卒列統攝庶  
工無揚干之亂行絕趙羅之辭役明興晦息日就月將巨  
績告終羣才叶贊自天成二年丁亥歲十二月一日起工  
版築至三年正月八日畢手公再飛章上奏詔曰敕知祥  
省所奏修治城壕畢功事具悉百堵皆興四旬而畢亘羅  
城而雲矗引錦水以環流外禦蠻夷中權帷幄公家之事  
相業可觀備覽奏陳殊深嘉獎於以表綸綺褒揚之寵知  
朝廷倚注之恩其新城周圍凡四十二里竦一丈七尺基

濶二丈二尺其上濶一丈七尺別築陴四尺鑿壕一重其深淺濶狹隨其地勢自卸版日構覆城白露舍四千九百五十七間內門樓九所計五十四間至三月二十五日停運斧斤其版築採造軍民共役三百九十八萬工其執事餓糧及役罷賞賚斗支秤給緡貫囊裝其數凡費一百二十萬其諸將大校出良駒於阜棧解重帶於腰圍選其纖柔釋其好玩曾無顧愛一以頒酬其縣大夫及寮佐已下或賞之器帛或給以緡錢咸有等差無不均普公却奢從儉節事省財馬如羊而不入私門金如粟而不藏私橐悉

肆公家之利盡充王事之資圖有謂之功非無度之費也  
公誠欲爲而不載樸而無文眾意未然牆進固請四民喧  
闐於衙閭萬口號沸於階墀父老曰公侯政治神明慈如  
父母前年定延孝之亂今歲防蠻蠚之虞盡力城隍務安  
井邑遂使我等保家庇族養老寧沖如是者功德在民憂  
勤報國安可不敘述休烈雕篆貞珉豈不美歟何容辭也  
公謂諸賓佐曰抑聞乘人之約義士猶或不爲貪天之功  
智者宜然不取所修邊備式耀國威將欲罄臣節於一時  
彰帝猷於萬古殊非已力難遏人情誰當游夏之才請紀

見聞之事昊相門牢落堂構蕭條翁歸文武之材明時待  
問荀息忠貞之志暗室不欺寐酣而白鳳昂藏染翰而墨  
龍夭矯嗟乎鄧禹秉鈞之歲雖慶承家陸機赴洛之年不  
堪觀國空餘壯節退卜良知驅車幸返於故園提筆謬登  
於華館金臺玉帳敢差俊彥之肩綠水紅蓮獲繼鶴鸞之  
踵酷慙薄技莫贊雄猷杜征南以矜大平吳沈碑漢水寶  
車騎以章明出塞勒碣燕山猶能炳著簡書發撝功業寧  
皆巨制永固坤維尚乏黃絹之辭孰拂白珪之玷受恩稟  
命紀事表年巍巍乎不奪不崩何患於爲陵爲谷

幸寅遜

寅遜夔州雲安監人仕後蜀後主起家茂州錄事累遷翰林學士加工部侍郎判吏部三銓事領簡州刺史國亡入宋授右庶子開寶五年爲鎮國軍行軍司馬罷職年九十餘卒

諫孟昶擊球馳騁疏

臣聞諸召公曰玩人喪德玩物喪志不作無益害有益功乃成不貴異物賤用物民乃足又曰不寶遠物則遠人格所寶惟賢則邇人安夫心猶火也縱則自焚故文王命周

公召公太公畢公輔相太子發太子嗜鮑魚太公不進曰  
鮑魚不登於俎豆豈可以非禮養太子哉由此觀之飲食  
必遵禮况起居玩好乎高祖皇帝節衣儉食惠養黎元化  
家爲國傳之陛下陛下宜親賢俊去壬佞視前代書傳究  
厯世興廢選端良之士置於左右訪時政得失天下利病  
奈何博戲擊鞠妨怠政事奔車躍馬輕宗廟社稷昔陶侃  
藩臣猶投擣捕於江况萬乘之主乎前蜀王氏覆車不遠  
矣臣又聞食君之祿懷君之憂臣雖爲外官每聞陛下賞  
一功誅一罪未嘗不振衣踴躍以爲再覩有唐貞觀之風

也今復聞陛下或採戲打球雖宮禁無事止於釋悶亦可  
一兩月時爲之臣慮積習生常不唯勞倦聖體復且妨於  
庶務諸司申覆因之淹滯其次奔蹄失馭奄有驚蹶陛下  
雖自輕奈宗廟社稷何